

第七段

父親的想念

父親：

喔，汝講彼工喔(發現應該要用麥克風，去拿麥)喂喂喂，按呢有聲乎？
爆炸彼當陣，拄仔咧歇熱，阮一大陣頭先是攏走去運動場彼，想講按呢卡安全，尾仔想講規氣共教室打乎開，予囡仔會當佇內底，看係欲歇抑是迫迫。

彼外口當咧爆，阮一大陣人就因為按呢鬥陣作伙佇咧教室內底陪囡仔迫迫，敢若一个半暝仔的安親班，啊我園長按呢。囡仔可能毋知影外口咧發生的代誌。阮逐家互相照顧，輪流去敲電話問親戚朋友有代誌無，啊若敲煞抑是無欲敲的，就來鬥騙囡仔。好，來矣來矣，等我一下乎。

啊彼暝，大人囡仔攏無啥物睏。開講啦、迫迫的迫迫啦，歡喜甲。一直到這馬，我攏猶會記咧彼暝的情景...毋是彼新聞報的恐怖的畫面喔，顛倒是，有一个暗暝，阮一大陣人共手機仔囡咧，鬥陣作伙開講...這是爆炸彼工我尚大的印象。只是講，天總是會光，電總是會來，大家就會慢慢仔恢復轉去卡早的生活方式。

啊...彼擺按呢過了後，我印象誠深的是，後來我若係囡仔去讀冊，經過彼个教室，我攏會特別留咧彼，看彼間教室按呢共看咧，啊就會想起彼暝我園長，大家佢快樂咧.....好啦好啦，來矣啦.....無恐怖無恐怖啦~~~

第三段

睡不著的人

睡不著的人：

有一個人我對伊有印象，毋過我毋知伊的名。他對車腳駛出來。伊彼皮膚，伊那沿皮和骨仔欲落甲毋成落，垂佇伊的手。毋過，伊的頭完全無礙著，那像是刁故意愛我甲看清楚伊痛苦的表情。伊甲我唉講，伊足痛。啊我想欲甲應，煞按怎嘛講袂出來，我想欲行對伊彼去，腳煞敢若乎綁咧，按怎就攏徙袂振動。就按呢，我甲伊相對看，看伊的手，彼塊欲落若毋落的彼沿皮；看伊人傷重目屎佇目箍砵砵輾。啊我煞干焦目睷金金啥物攏做袂來，伊就按呢...一直甲我看...一直甲我看...看看看看甲我對夢中精神起來。彼個眼神，我一直攏無法度放袂記，敢若佇甲我講，為啥物我就毋免像伊按呢受苦，為啥物是伊愛受這款折磨.....是啊，為啥物？

所以，我攏莫去恰遮的夢對抗（我攏袂去怨嘆是按呢我會去夢著這），凡勢，予個會當怨感我，是我猶會使做會到一點點仔一點點仔的好意。

第四段

有期限的復原

A:我共你講，我真影感覺我最近好誠濟。

B:敢按呢？

A:袂好嘛著愛好，照時間來算的啊，時間過去啊，錢開了啊，就一定愛好原全啊。

B:這款代誌嘛會使有期限喔？

A:你看，我真影好真濟，這皮膚的空喙攏好啊，賸的提來買藥膏糊堅疤猶真冗的。

B:按呢敢就有夠啊

A:當然嘛有夠啊

B:猶毋過我敢若猶未好起來呢

A:按呢你要加油啊，愛趕緊好起來

B:加油敢就會用得啊

A:當然囉

B:毋過我敢若攏會陷眠足歹睏

A:愛好起來，就愛家己開錢去看醫生

B:啥，遮錢我愛家己出喔

A:咱愛知足，會當提著遮補償，已經是誠好矣

B:敢按呢

A:汝愛家己承擔，這社會就是按呢。而且，逐工攏會有比你閣較悽慘的人出現。我已經共你講過矣，別人無法度單顧你啦，你干焦會當共家己顧予好。就算講咱攏知影好需要閣較濟的時間，抑是一切無可能真影好會哩。毋過咱猶原愛相信發生過的代誌，攏會過去。會好起來的。

B:會好起來的？

A:會改變的

B:會改變的？